



'Takkan nak tunggu nyawa melayang?'

Penduduk Bandar Mahkota harap pihak berwajib pandang serius isu jalan rosak

BANDAR MAHKOTA - Bukan seminggu, bukan dua minggu namun sudah lima tahun jalan utama Bandar Mahkota rosak dan terbiar begitu sahaja.

Selama itu juga penduduk di kawasan berkenaan berdepan dengan pelbagai masalah dan risiko kemalangan.

Seorang suri rumah, Juliat Juni, 37, berkata, laluan sepanjang 4.3 kilometer itu kini berlubang dan tidak rata.

"Akak dah lapan tahun tinggal sini, keadaan jalan tu makin lama makin tenik...kami penduduk, nak jak nak kena hadap hari-hari laluan ni."

"Setiap kali hujan, risau sangat... dengan jalan licin, berlubang-lubang pula tu, air pula bertakung. Akak sendiri bila bawa motor dah beberapa kali nyaris terjatuh.

"Harap sangat masalah ni dapat perhatian pihak bertanggungjawab," katanya.

Abdul Rahman Tiro, 51, berkata, penduduk kecewa kerana isu itu langsung tidak diberi perhatian pihak berwajib.

"Yang jadi mangsa kitalah...bila kita kata jalan rosak, maksudnya ia melibatkan nyawa orang ramai. Jadi takkan nak tunggu nyawa melayang baru nak ambil tindakan!" katanya.



Sulaiman (dua, kanan) sempat membuat tinjauan di sepanjang kawasan jalan yang rosak bersama sebahagian penduduk.

Penduduk hampir putus asa

DALAM pada itu, Wakil Persatuan Penduduk Jalan Mentari, Abu Hanifah Majid, 50, berkata, pihaknya sudah pun memanjangkan isu tersebut kepada pelbagai pihak.

"Sampai sekarang macam tu juga...tak nampak bayang pun pihak yang nak datang membantu. Masalah dah lama, kadang-kadang rasa putus asa

dibuatnya," katanya.

Dalam pada itu, Pengerusi Pembangunan Persekutuan Parlimen Kuala Langat, Datuk Sulaiman Mohd Karim berkata, beliau menggesa pihak yang bertanggungjawab mengambil serius isu berkenaan.

Katanya, jika ada masalah antara pemaju dan pihak berkuasa tempatan sekalipun pasti ada jalan

penyelesaian.

"Jangan disebabkan tak ada kaitan tak nak ambil tahu langsung dan yang jadi mangsa adalah penduduk."

"Apa pun pihak bertanggungjawab perlu cakna dengan isu penduduk dan bukan biarkan masalah itu tanpa penyelesaian," katanya kepada Sinar Harian.

Kerja penyelenggaraan bakal dilaksanakan

SEMENTARA itu, Yang Dipertua Majlis Daerah Kuala Langat (MDKL), Mohamad Zain A Hamid berkata, sesi perjumpaan antara pihak MDKL, Majlis Persatuan Penduduk Zon 19 bersama pihak pemaju telah pun diadakan pada 16 Mac lalu.

Menerusi perbincangan tersebut, suatu langkah penyelesaian telah dipersetujui yang mana pihak pemaju berkaitan akan memulakan kerja-kerja penyelenggaraan di jalan utama mengikut bahagian kawasan

dalam tempoh dua minggu yang akan meliputi skop penyelenggaraan jalan, longkang, rumput, landskap dan lampu yang masih berada di bawah tanggungjawab pihak pemaju.

Mohamad Zain turut berkata, pihaknya telah menetapkan tempoh tiga bulan daripada tarikh perbincangan untuk pihak pemaju mengemukakan perancangan bagi pelaksanaan menyiapkan keseluruhan jalan di kawasan Bandar Mahkota.

